

Süschée 2015

## .....alles Schuum!?



S'Neyschte wältwyt – ohni **Ruhm**;  
dr Super-Slogan - .....**alles Schuum!**

Z'Brasilien an dr Wältmaischterschaft  
hett sone Witzfiguur s tatsächlich gschafft,  
dass me all vier Joor persee  
wieder ebbis Neys ka gseeh!

Dä **Schuumschleeger** Blatter – me glaubt's jo kuum,  
will iberall eso Strich uss **Schuum!**

So hett die Walliser **Drogge-Pfluume**  
9 Meter Abstand welle **beschuum!**  
... **alles Schuum!**

Und will jo dr Fuessball s'Hauptiibel blybt,  
mit de Riese-Fäähne men au iberdrybt,  
muess logisch au e FIFA-Faahne  
als Blatter-Gaiferlätzli aane!

D'Latz-Greessi – do kasch jubiliere  
duet d'Korruption au guet gaschiere!  
Vom **Mittelraum** zem **Goali-Ruum**  
stinggt's do iberall - no **Schuum!**  
... **alles Schuum!**

Me ka so au vo **Bier-Schuum** reede,  
im **Stroof-Ruum** kennt men au verbleede,  
im **Spielruum** hett's z'vyyl **Zwische-Ruum**,  
und d'Saifi gheert in **Duschi-Ruum**,  
bim **Door-Ruum** isch dr **Balligs-Ruum**,  
dr **Stau-Ruum** gheert in **Koffer-Ruum**,  
und dä, wo's erfunde hett – dä **Schuum**,  
läbt maischtens au im **hohle Ruum!**  
... **alles Schuum!**

Doch s'gitt bigott no anderi **Schüümüli**,  
politische und **Prominänte-Pflüümüli!**  
Zem Byschpiil d'Zigge Heidi **Kluum**,  
die läbt im **Wahnsinns-Dauer-Schuum!**  
D'Nationale Suisse – dä stolzi Namme  
goht **schuumig** zer Helvetia-Mamme,  
und dr CEO Kienzli hett sy **Schuum**  
au derte wieder im **Tresor-Ruum!**  
... **alles Schuum!**

Im Basel-Oscht hänn's welle baue,  
s'Volgg wott nit dä **Ruum** versaue!  
Dr Morin losst doch d'Gärte **ruume**;  
wo hett denn dä sy griene **Duume?**  
Dr Unterwasser – s'isch allerhand,  
schloot vor, dr **Luft-ruum** z'wäggsle;  
Rieche sell zue Baselland!  
Dä miesst me **schuumig** „häggsle“!  
... **alles Schuum!**

S'kauft ain Kebab im **Inne-ruum**,  
vyyl scharf und bitzeli **Schuum!**  
Dr Ösil sait, das syg e **Boom**  
im neye freie **EU-Ruum!**  
Dr Ras-Putin maint ganz apaart;  
ych bi das nit – ych grieg kai Bart!  
Är bekäm im **Warte-ruum**  
numme so Ukraine-**Fluum!**  
**... alles Schuum!**

Dr Kessler mit dr Power-Schnure  
maint, är käm mit allem dure;  
dä Fähl-Entwiggler vo dr Stadt  
findet sy Ziridytsch no glatt!  
Und d'Baustell Basel, mir hänn'satt,  
dr Wessels hett das **aanepfluumt**;  
die Rotwysbrätter gheere glatt  
mitsamt em Wessels **zämmegruumt!**  
**... alles Schuum!**

Denn spielt no aine Souza-phon,  
d'Linie isch sy **Fitness-ruum!**  
Und närvig drybt är pro Match als Gloon  
zäh neyi Spieler glatt in **Schuum!**  
Und - aine hett no **Wöschruum-Daag**,  
bevor är ins Joggeli seggle maag;  
Dert spyysch denn s'Baschi-Dürr-**Voluume**,  
wenn är losst d'Hooligens **beschuum!**  
**... alles Schuum!**

Zem Schluss mecht ych do nit **versuume**;  
am Donnschtig mien mir **zämmeruume**,  
verbyy dä **Fasnachts-Sänderuum**;  
s'goht zrug in bleede **Stadt-Parggruum**,  
und Souplless kunnt mit Hilf vo Banaane  
via **Uffwachruum** denn wieder aane!  
Und z'letscht verblybt – de glaubsch es **kuum**,  
dr neyschti Slogan - **... alles Schuum!**